

**Uunga siunnersuut: Meeqqanik pinerliisimanginnermut uppersaatinik  
piumasaqaateqartussaataaneq pillugu Inatsisartut inatsisaata allanngortinnera pillugu  
Inatsisartut inatsisaat.**

**pillugu**

**Inatsisinut Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Anders Olsen, Siumut, siulittaasoq  
Inatsisartunut ilaasortaq Aqqalu Jerimiassen, Atassut, siulittaasup tullia  
Inatsisartunut ilaasortaq Mala Høy Kúko, Siumut  
Inatsisartunut ilaasortaq Harald Bianco, Inuit Ataqatigiit  
Inatsisartunut ilaasortaq A sii Chemnitz Narup, Inuit Ataqatigiit

Oktobarip ulluisa arfernanni 2022-mi siullermeerinninnerup kingorna ataatsimiititaliap  
siunnersuut oqaluuseraa.

**Siunnersuutip imarisaa siunertaalu**

Aalajangiiffigisassatut siunnersuutip UKA2019/49-p Inatsisartunit  
akuersissutigineqarnera tunngavigalugu siunnersuut saqqummiunneqarpoq, tassanilu  
meeqqanik pinerliisimanginnermut uppersaatinik piniartarneranut pisussaaffik pillugu  
Inatsisartut inatsisaanni meeqqat ukiuisa 15-iniit 18-inut qaffanneqarnissaa siunertaavoq.

Siunnersuut naapertorlugu atuutilerneraniit inunnik atorfinitsitsinermini imaluunniit  
sulilersitsinermini, sulisut suliaqarnerminnut atatillugu inunnik 18-it inorlugit ukiulinnik  
toqqaannaq attaveqartartussaataillugit aamma inuit suliaqarnerminnut atatillugu inuit 18-it  
inorlugit ukiullit aalajangersimasumik akornanniittartussaasut, taamatullu taakku meeqqat  
toqqaannaq attaveqartarunik, meeqqanik pinerliisimanginnermik uppersaammik  
piniartartassaaq.

Ullumikkut 15-inik ukiulinnut killeqarpoq.

Oqartussani, suliffeqarfinni, atuarfinni aamma peqatigiiffinni il. il. aalajangersimanerusuni atorfininnermi imaluunniit sulilernermi meeqqanik pinerliisimanginnermik uppersaammik piniartussaataaneq taamaallaat suli atuutissaaq. Taamaattoq siunnersuutikkut pisussaatinneqartut amerlineqassasut: Taamaalilluni meeqqanik sullissaqartut angallassinermi toqqaannartumik meeqqanik angallassinermut tunngatillugu sulilerneranni aamma meeqqanik pinerliisimanginnermut uppersaammik piniartoqartalissaaq.

Meeqqanik pinerliisimanginnermut uppersaataat inunnut 18-it inorlugit ukiulinnut kinguaassiuutitigut pinerlussimanerannut ersarinnerusumik allassimasoqartarnissaa aamma siunnersuummi allassimavoq. Ullumikkut aamma matumani 15-inik ukiulinnut killeqartinneqarpoq.

Meeqqanik pinerliisimanginnermut uppersaataat kinguaassiuutitigut pinerlussimanernik qanoq ittunik nalunaarsueriaatsimik nutarterinissamik ilaatigullu allanguinissamik siunnersuut aamma imaqarpoq. Tamassumap pinerluttulerinermi inatsimmi immikkoortup kinguaassiuutitigut pinerlunnernut tunngasup 2019-imi allanngortinneqarneranik aallaaveqarnera pingaartumik maluginiarneqassaaq.

### **Inatsisartuni siunnersuummik siullermeerinnineq**

Timersorluni unammisoqartillugu kinguaassiuutitigut pinerliisoqaratarsinnaanerata minnerpaaffimmiitinniarlugu timersortartunut aamma meeqqanik pinerliisimanginnermik uppersaammik piniartalertussanngorlugit siunnersuutigineqartoq annertunerulersinneqarsinnaanera siullermeerinninnermi eqqartorneqarpoq.

(Tamatuma saniatigut uppersaamma allassimasoqartillugu sulilersitseqqusaannginnerup eqqunneqarnissaanik periarfissat kiisalu unioqutitsisoqarsimatillugu pillaatit sakkortunerulersinnissaannut periarfissat eqqartorneqarput. Taakkuali isumaliutit Inatsisartut inatsisaata inatsisissatullu siunnersuutip matuma avataaniimmata, isumaliutissiissummi matumani sukumiinerusumik sammineqassanngillat. Inummik 18-it inorlugit ukiulimmik pinngitsaaliilluni atoqateqarnermut imaluunniit allatut kinguaassiuutitigut tunngasumik pinngitsaaliinernut tunngasunut pillaasernerup qaffasissusaanut tunngatillugu UKA2021-mi pineqaatissinneqartarnerup 50%-imik qaffanneqarnera eqqaasitsissutigineqassaaq. Meeqqanik kinguaassiuutitigut pinerlunnernut suli at ilaat pineqaatissiissutigineqartarneri qaffaanerup kinguneranik toqutsisimasut pineqaatissinneqartarnerisa qaffaseqataanik inissinneqarput.)

### **Naalakkersuisunut apeqqutit**

Siullermeerinnineq tunngavigalugu siunnersuummik annertunerulersitsinissamut periarfissat

pillugit, timersorluni unammisoqartillugu kinguaassiuutitigut pinerliisoqaratarsinnaanerata minnerpaaffimmiitinniarlugu timersortartut aamma meeqqanik pinerliisimannginermik uppernarsaammik piniartalertussanngorlugit siunnersuutip ilaneqarsinnaanera ataatsimiititaliamit Naalakkersuisunut apeqqutigineqarpoq. Apeqqutit Naalakkersuisullu akissutaat ilanngussaq 1 aamma 2-tut kakkiunneqarput.

### **Ataatsimiititaliap siunnersuummik suliarinninnera**

Meeqqanik pinerliisimannginermik uppernarsaammik pissarsiniartarnek pillugu maleruagassat atuuttut pinerlussimasunik nalunaarsuiffik pillugu nalunaarummi inatsimmik tunngaveqartariaqartut Naalakkersuisut ataatsimiititaliamut akissuteqaatiminni innersuussutigaat. Tamatumunnga nangillutik Naalakkersuisut ima allapput:

*”Taamaasillunilu Pinerlussimasunik Qitiusumik Nalunaarsuiffik pillugu nalunaarummi qitiuvoq paasissutissanik ingerlatitseqqittarneq meeqqanik pinerliisimannginermik uppernarsaatikkut pisartog tunngaveqartussaasoq atorfeqarnermik imaluunniit sulisorineqarnermik atuuttumik. Tamanna atuuttanngilaq inunnut timersoqatigiiffimmut ilaasortanngortumut sulorarnermik, assammik arsarnermik imaluunniit arsaattarnermik sammisaqarnissamik siunertaqarluni. Taamaattumik akuersissuteqanngilaq Inatsisartut inatsisaanni malittarisassiorsinnaanermut meeqqanik pinerliisimannginermut uppernarsaammik piniartarsinnaanermut timersornermik ingerlatsisuusunut, suliaqarnermut attuumassuteqanngitsunut, akissarsiaqarluni akissarsiaqaraniluunniit.”*

### **Ataatsimiititaliap inassuteqaatai**

Timersortartut peqatigiiffiini meeqqanik pinerliisimannginermik uppernarsaammik piniartoqartarnissaanut unammilligassanik qaangiiniarnermi Naalakkersuisut Kalaallit Nunaanni Timersoqatigiit Kattuffiannik oqaloqatiginninniarnissaannut ataatsimiititaliaq kaammattuuteqassaaq. Tassunga ilaliullugu, Naalakkersuisut Kalaallit Nunaanni Timersoqatigiit Kattuffiannik oqaloqateqarnermini unammiarnermi imaluunniit aqqissuussani assingusuni atornerluisoqarsinnaaneranut aalajangersimasunik ersarissunillu malittarisassaqarnerup pinaveersaartitsinermit tapertaasinnaanerata qulaajarniarneqarnissaa ataatsimiititaliamit kaammattuutigineqassaaq. Assersuutigalugu unammiartoqartillugu assingusunilluunniit aqqissuussaqartillugu, inersimasut peqataasut amerlassusissaannut tunngasut oqaluuserineqarsinnaapput.

Taama oqaaseqarluni ataatsimiititaliap isumaqatigiittup siunnersuutip akuersissutigineqarnissaa inassutigaa.

Taama oqaaseqarluni ataatsimiititaliap siunnersuut aappassaaniigassanngortippaa.

---

Anders Olsen  
Siulittaasoq

---

Aqqalu Jerimiassen  
Siulittaasup tullia

---

Mala Høy Kúko

---

Harald Bianco

---

Asii Chemnitz Narup